



Sakspapir

Saksbehandler	Arkiv	ArkivsakID
Jan Torry Sande	FE - 143	14/664

Saksnr	Utvalg	Type	Dato
089/14	Formannskapet	PS	14.10.2014

Planprogram for kulturminneplan.

Vedlegg:

Kulturminneplan - utkast til planprogram per 190914

Saksutgreiing:

Bakgrunn

I «Planstrategi for Fedje kommune 2012-2016» vedteken i K - Sak 013/14 står det at Fedje kommune skal lage ein kulturminneplan i 2014/2015. Riksantikvaren har og klare forventningar til at kommunane har eit slikt styringsdokument.

Vurdering

Lokalhistorie er identitetsskapande. Det er ønskjeleg at arbeidet med ein kulturminneplan for Fedje vil skape diskusjonar omkring kva kulturminne som er sentrale i ein slik lokal identitet. I tillegg vil det ligge faglege vurderingar til grunn for kva minne som bør få ein vernestatus.

Eit sentralt steg i prosessen mot ein endeleg plan er å samle inn så mykje av eksisterande kunnskap som mogeleg om lokale kulturminne. Dette er eit arbeid kultursekretæren og kommuneplanleggjaren er i gang med, men ikkje ferdig. Di meir kunnskap me får, desto fleire kjelder til kunnskap vert oppdaga. Denne innsamlinga av kunnskap vil verte ein sentral del av arbeidet med planen. Denne kunnskapen er ein føresetnad for å lage ein plan for vidare undersøking.

Med bakgrunn i denne kunnskapen, og i tråd med eksisterande kommuneplan, vil delplanen vise kva kulturminne Fedje kommune vil prioritere å arbeide vidare med. Me har vald å prioritera fysiske kulturminne i landskapet. Ei av årsakene er at kunnskap om verna minnesmerke er ein føresetnad for god arealforvaltning. Ei anna er at det er naudsynt å snevre inn fokuset for ein slik plan for at arbeidet ikkje skal «smuldre opp». Me ønskjer ein ferdig plan i løpet av hausten 2015, og må difor ta nokre val om prioriteringar. Ein god kulturminneplan kan gje ringverknader for næringsliv og næringsutvikling.

Nabokommunane Austrheim, Radøy og Meland er og i gang med arbeidet med ein kulturminneplan. Me har difor etablert eit samarbeid der me kan utveksle erfaring og kunnskap. Me vil samkøyre



Fedje kommune

nødvendig opplæring og hjelpe kvarandre der det er mogeleg.

Folkehelse: Mange av kulturminna ligg ute i landskapet. Tilgjengeleggjing av kulturminne vil skape aktivitet for folk lokalt.

Miljø: Gode planar har relevans for arealbruk. Ein kulturminneplan vil vere eit verkty for arbeid med kulturlandskap og landskap generelt. Vern av eldre bygg, og gjenstandar, i landskap vil ha ein miljøgevinst av di «vern gjennom bruk» er eit prinsipp me ønskjer å fokusere på. Bruk av eldre bygg er med andre ord gjenbruk.

Økonomi: Fedje kommune har fått 100000,- kr. i stønad frå Hordaland fylkeskommune til arbeidet med ein kulturminneplan. I tillegg vil kulturkontoret legge inn eit forslag om ein pott på kr. 50000,- på det kommunale budsjettet for 2015.

Konklusjon

Fedje kommune skal no byrje på arbeidet mot ein lokal kulturminneplan. Arbeidet skal vere eit samarbeid mellom Fedje kommune og friviljuge krefter. Arbeidet skal resultere i ein lokal kulturminneplan som skal vise vegen for det vidare arbeidet med kulturminne på Fedje.

Ein kulturminneplan skal ha eit oversyn over eksisterande kjelder til, og kunnskap om, lokal historie. I prosessen mot ein ferdig plan må det samlast inn ytterlegare kunnskap og registrerast kulturminne. Prosessen skal vere demokratisk og inkludere fagfolk, offentlege institusjonar, lokale lag og eldsjeler.

Ein brei prosess må forankrast politisk og i det friviljuge arbeidet. Korleis dette best skal gjerast bør diskutertast.

Kulturminneplanen vil ha status som kommunedelplan. Det kan utarbeidast ein kommunedelplan for alle tema/ sektorar der det er hensiktsmessig (Plan- og bygningslova §11). Slike planar bør vere forankra i samfunnsdelen i ein kommuneplan. Den skal ha ein handlingsdel med tiltak som skal gjennomførast i kommuneplanperioden, og som vert rullert kvart år i samband med handsaming av økonomiplanen.

Det første steget mot ein endeleg kulturminneplan er eit vedteke planprogram. Vedlagt denne saka er det eit første utkast til eit planprogram. Utkastet reiser fleire problemstillingar som til dømes:

- Kva er målet med planarbeidet og kva skal utgreiast i planen?
- Kva ressursar skal nyttast?
- Kva er den beste organiseringa av prosessen mot ein ferdig plan?
- Kva omfang av kunnskap skal samlast inn og korleis skal arbeidet organiserast?

Forslag til vedtak:



Fedje kommune

Formannskapet tek saka til orientering.

Formannskapet - 089/14

F - behandling:

F - vedtak:

Formannskapet tek saka til orientering. Samrøystes.